

## 2 TIMOTI

Póól ngê Timoti ka pweepwee pee ngmê dy:ââ ngê, u pi 1 Timoti. Póól modoon:aa dpodo, Yesu u pi pi knî ye modoon:aa tpaê. U kuwó dini ghi ngê Lóma lede knî y:oo mbwa k:oo myombó mê km:êê ngópu. Yi ngwo Póól ngê pweepwee pee m:uu d:êê ngê, Timoti ka mye dy:ââ ngê. Ala yi pweepwee pee. Póól ngê pweepwee pee daam:uu d:êê ngê, ala u kuwókuwó pweepwee pee.

<sup>1</sup> Mw:ââkó Timoti, nê Póól, Chóó Lémi ngê a ngmidi noo, Yesu Kédisu u dyépi ngê a pyódu noo. Kópuni wunê a vyu, Yesu Kédisu ngê ntiye ngê, yélini yi k:ii u kwo nmo kélîmî té, ghê kamî nmo a kpo. Yi kópu dyuu tpaê u l:êê dîy:o pi knî ye dy:ââ noo.

<sup>2</sup> Timoti a tp:ee, nuu ghi ntênê a nódo a tóó. Nmî Mí Chóó Lémi, nmî Lémi Yesu Kédisu u k:ii, mb:aamb:aa ngê nga dny:oo a vyuwo, ye chi ch:anêch:anê, nuw:o ngmidi ngê dny:oo a pyépi.

*Póól ngê Timoti u ngwo mêtê wêdêwêdê kwólu*

<sup>3</sup> Timoti a tp:ee, Chóó Lémi n:aa kwunokwuno ngê. A kn:ââ knî y:oo ntee dnyimo a cháâcháâ, yinté myiné cháâcháâ, u maa d:oo kn:aadi ngê. L:êê dîy:o n:aa kwunokwuno ngê, myenté w:êênî mgídí vy:o l:êê dîy:o u kwo myiné ngêpê yédi. \*

<sup>4</sup> Dini ghi n:ii ngê munê kuwo nyoo, a l:êê dîy:o munyoo a mbê. Yi kópu n:aa nuw:onuw:o, u ya a nga a kwo, M:aa m:uu ngi, w:aa u ngwo anê pyw:oo.

---

\* 1:3: Dpodo 24:16

<sup>5</sup> Yesu Kédisu ka munyinê kêlîmî mbê wo, yi kópu mye anînê nuw:onuwo. Ngêpyââ Lówisi, mye Yunisi k:ii ntee a kêlîmî mbê knopwo, a lama ka tóo yinté my:ee kêlîmî. \*

<sup>6</sup> Yi kópu u l:êê dîy:o nga mênînê tpaê, dini ghi n:ii ngê a kêê dê mêmê nê yé doo, dpodoni u l:êê dîy:o nmî Mî ngê u ntââ ngê a pyódu nyoo, yi dpodo ntênê chi dódó. Ndyuw:e k:ii dpî widi, kîngê pw:onu.

<sup>7</sup> Nmî Mî ngê chóó u Ghê Dmi nmî mênê yó. Yi Ghéni Dmi ngê daa nkîngê pyu ngê dpî pyódu nmo, ngmênê u wêdêwêdê nmî mênê dpî yé, yoo yi nuu ghi dmi nmî nódo u ngwo dpî yââ, nmî chóóchóo myenmînê tpyuu nmoo. \*

<sup>8</sup> Nmî Lémi p:uu dpodo tédê nama a nkîngê, pi knî ye u pi cha a tpaê. K:omo tpile u pi tpaê u l:êê dîy:o mbwa k:oo km:êê noo, ngmênê a l:êê dîy:o kîdangê nkîngê mb:anê. Nmî Lémi p:uu dpodo tédê ntee n:aa mgîni vyîmî yédi, yinté myecha a mgîni vyîmî, nmî Mî ngê u ntââ ngê u ngwo wa a pyódu ngi. \*

<sup>9</sup> Yinê a ngmidi nmoo, kóó k:oo kaa nmoo, chóó u yoo ngê pyódu nmoo. Daa nmî chóó nmî l:êê ghi dmi yi dîy:o a ngmidi nmoo, ngmênê u kwo nmo ch:anê dniye, chóó u nuw:o ngê a ngmidi nmoo. Dyámê pê ghêlî dèpèngê l:âmo ngê, yi ngwo doo a nuw:onuwo nmo, apê, A Tp:ee ngê a kêê k:oo yiné amî kaa té. \*

<sup>10</sup> Ala ngwo yi kópu nmî dye ghi ngê dê pyódu, nmî Mbwámê Yesu Kédisu nmî l:êê dîy:o pwene,

---

\* **1:5:** Dpodo 16:1    \* **1:7:** Lóma 8:15    \* **1:8:** Lóma 1:16    \* **1:9:** Epeso 2:8-9; Taitas 3:4-5

mêdê pii wo, pwopwo u wêdêwêdê u ngwo chedê ngê, ghê kamî nmo a kpo, ghéni n:ii chedê ngê daawa pyódu. \*

<sup>11</sup> Yi kópu tƧapê u l:êê dîy:o nmî Mî ngê a ngmidi noo, pi knî ye dy:ââ noo, a ka pê, Chín:aa ndiye kîgha dé. \*

<sup>12</sup> Yi kópu u l:êê dîy:o n:aa mgîni vyîmî, ngmênê dîni nkîngê, mu kópu u dîy:o pini n:ii p:uu a nuw:o nî kââ, a lama pini, daawa dóo nê. Dpodoni nêdê a kaa noo, chedê ngê daawa pyódu. A lama ka tóó, Nmî Lémi u yoo knî ye ada a vyyuwo, u dî, wéni n:ii ngê wa a diyé.

<sup>13</sup> Kópuni dyuu a kwo nyinê ny:ee too, ñuw:o nêdê ntênê dny:oo ya. Ntee noo a dpodo, yinté myecha a dpodo. Yesu Kédisu ngê u kwo a kââdî nyoo, u kwo chi kêlîmî, u nuu ghi nódoo choo ya. \*

<sup>14</sup> Kópu dyuu ndêndê n:ii lama a kwo, nangmê ngmêê, pi knî ye ntênê chi tƧapê dé. Nmî Lémi ngê ghéni n:ii dmi nmo a kpo, u wêdêwêdê mbêmê yi dpodo chi dóó.

### *Pi pyile knî yi p:uu kópu dyuu*

<sup>15</sup> Lama kîyedê tóó, Esiya Wee u kwo tƧémi yintómu kpeme a ka dê yaa dmi, Paikilas pini dê Hêmokenes yinté a ka myaa pyaa knî. \*

<sup>16</sup> Ngmênê Onésipódas kpeme a ka daa yaa wo. K:omo tƧile mbwa k:oo n:aa kwo, ngmênê a l:êê dîy:o mywene u ngwo daa ghê wo, daa ng:êêntómu ngee noo. Yi kópu u l:êê dîy:o nmî Lémi ka yi pini mupwoknî dny:oo ch:anêch:anê.

\* **1:10:** Hipîlu 2:14-15      \* **1:11:** 1 Tim 2:7      \* **1:13:** Taitas 1:9

\* **1:15:** 2 Tim 4:16

<sup>17</sup> Dini ghi n:ii ngê Lóma a loo, a nmy:uu kn:ââ u ngwo a chópu, u dí mbwa k:oo mîné pyw:ee noo.

<sup>18</sup> Myenté dini ghi n:ii ngê Epeso nipi nyipu a dpodo, lama kîyedê tóó, mb:aamb:aa ngê y:i doo a ngêêpî nê. U ya a nga a kwo, Kuwókuwó wéni ngê nmî Lémi ka ntênê paa ch:anê we.

## 2

### *Mgîni vyîmî u kópu dyuu*

<sup>1</sup> Timoti a tp:ee, Yesu Kédisu p:uu dpodombiy:e chi dpodo, mu kópu u díy:o vyîlo u wêdêwêdê mbêmê nye dpodo.

<sup>2</sup> Pi yilí knî ye ngópu munoo a dêêpî. Pi knî ngmêdpo ngmîdi ngî, n:ii knî y:oo daawa dóó ngî. A kópu dyuu yi nuwo dpî kwéli, yoo pêdny:oon:aa ndiye kîgha dé.

<sup>3</sup> Yélini yi k:ii Yesu Kédisu ka nmo kêlîmî té, u lede ntee tpile ngê nmo pyede, Setan p:uu nmo l:êê té. Yi l:êê têdê nangmê mbêpê, myecha a mgîni vyîmî.

<sup>4</sup> Ledeni u nuw:o chóó u kópu knî yi p:uu a kwo yédi, doo u kada pini u nuu u pi ngê dpî pyódu, ngmênê n:ii u nuw:o l:êê p:uu a kwo yédi, u kada pini ka pi mb:aa ngê dpî pyódu.

<sup>5</sup> Dini ghi n:ii ngê tp:ee dmââdîma a mbêpê nyédi, n:ii ngê mbêpê u kópu dyuu dpî pwââ, k:omo tpile kada dp:uu ghê, ngmênê u mbêpê u pywuu d:uuwodê gee. \*

<sup>6</sup> Pini n:ii yâpwo têdê dpodombiy:e a dpodo yédi, vyîlo yi pini ngê yi ntini nt:u mwiyé dpî d:uu. \*

---

\* **2:5:** 2 Tim 4:8      \* **2:6:** 1 Kódin 9:7,14

<sup>7</sup> Yi dyimê pywuu pyile knî yi p:uu cha a nuw:o, nmî Lémi ngê u ntââ ngê wa pyódu ngi, kópu yintómu u ngwo anyiné w:ee té.

<sup>8</sup> Yesu Kédisu dyimê pywuu ngê nga myenînê pyépi. King Dépidi u tii nedê pini ngmê, ngmênê doo mgînê vyîmî, mye pwene. U kuwó dini ghi ngê kpêênî mêtê pii wo. Yi kópu pi knî ye noo a tpaê.  
\*

<sup>9</sup> Yi kópu u l:êê dîy:o mbwa k:oo anî kwo, yiné ye, Nê ngê dono ndîi ngmê d:uu ngê. K:omo tpile mbwa k:oo km:êê noo, ngmênê nmî Mî u kópu dyuu daa mgîmî ngópu, p:aani p:aani pi knî y:oo mîné nyêmî ngmê.  
\*

<sup>10</sup> Yi kópu u l:êê dîy:o dono yintómu nînê vyîmî too. Yélini nmî Mî ngê myedê ngmidi too, u ya a nga a kwo, Yesu Kédisu u pi mye ny:ee y:e, u kwo kêlîmî mbê dniye, kóó k:oo nipi paan:aa ghê kmêlé, dye ghi yintómu u k:ii nipi paan:aa ya kmêlé.  
\*

<sup>11</sup> Ndê kópu ngma ala,  
Yesu Kédisu ntee pwene,  
nmî nuw:o dono yinté mye pwene.  
Ntee a pii wo, yinté amêno pii dmi,  
u k:ii nipi anmîn:aa ya.  
\*

<sup>12</sup> U l:êê dîy:o dono vyîmî daanmî yé knomomê,  
ye u pi ntoo, nmî pi dmi yintoo ngê wamî pyódu.  
Anmo wópu knomomê, u nkwo wa wópu nmo.  
\*

<sup>13</sup> K:omo tpile wanmî dóó knomomê,  
ngmênê daawa dóó nmo,  
mu kópu u dîy:o kópuni wunê a vyu,

\* **2:8:** Lóma 1:3-4      \* **2:9:** Pilipay 1:12-14      \* **2:10:** Kîlosa 1:24

\* **2:11:** 2 Kódin 4:11      \* **2:12:** Mát 10:33

daawa têd:a. \*

*Nmî Mî p:uu dpodo pyu mb:aa*

<sup>14</sup> Nmî Mî ngîma pi knî ye ala kópu dpî vyi ngi, yipi, Kópu nt:u kópu knî yi p:uu numo ka namê kwopwepe. Yi kwopwepe ngê yoo d:uudpî ngee, ngmênê dpî dyênê té. \*

<sup>15</sup> Dpodombiy:e chi dpodo, nmî Mî ka pi mb:aa ngê paa pyédi, ala kópu m:uu paa vyi ngê, A dpodo pyu mb:aa, ndê kópu dyuu ntênê a tpaépê ngê. Yi kópu u l:êê dîy:o mywene nga daawa ghê. \*

<sup>16</sup> N:ii knî y:oo k:omodanê kópu a tpaépê tumo, kpeme ye chi yââyââ. Yinté kópu knî y:oo yoo nmî Mî u maa p:uu daa kapî tumo, kn:aa máádi p:uu dpî kaa t:oo.

<sup>17</sup> Ghîmî péé pi p:uu ntee a kmaapî yédi, yi kópu dyuu ngê yoo yinté dpî dyênê. Yélini yi kópu knî yi p:uu a danê nyédi, yi vy:o ala pini dé a kwo mo, Haimeneyas pini dé Piletas.

<sup>18</sup> Yi tpódu y:oo maa ndêndê kn:aadi ngópu, pi knî ye yipu, Dini ghi n:ii ngê Yesu ka nmo kêlîmî mbê dniye, yi ngwo nmo pii dniye, kn:aa pyidepyide daamu a tóó. Yi kópu mbêmê yi tpódu y:oo pi woni yi kêlîmî dyênê tumo.

<sup>19</sup> Ngmênê nmî Lémi u yoo daawa dyênê t:oo, wa dêê knî, mu kópu u dîy:o nmî Lémi ka u yoo u ngomo ntee tpile ngê a kwo. Dini ghi n:ii ngê u ngomo wó, kââ pââ dyuu wêdêwêdê ngê kaa too, doo u ntââ pi ngê u dînê daawa ghodo. Yi ngomo p:uu kópu miyó a t:a, ngmê alanté,

Nmî Lémi u lama u yoo a kwo,

\* **2:13:** Lóma 3:3-4; Num 23:19; Taitas 1:2

\* **2:14:** Taitas 3:9

\* **2:15:** Taitas 2:7-8

myomoni alanté,  
 N:ii ngê dpo, Nê nmî Lémi u yoo vy:o pini ngmê,  
 yi pini ngê dono kópu kîngmê d:uu. \*

<sup>20</sup> Dyimê pywuu ngma ala. Mââwe ndîi u ngomo k:oo d:ââ mwee dêdê ghêdê, dyêêdî daa ngmidi. Woni silîpê ngê l:âmo tumo, woni nkól ngê l:âmo tumo, naa ndîi u dye ghi ngê yi tpile u ngwo dpî pwii dmi. Woni yi pee ngê l:âmo tumo, woni têpê ngê l:âmo tumo, yi pi dmi daa ndîi. \*

<sup>21</sup> Nmo yinté tpile dé, nmî Lémi u d:ââ mwee ntee tpile ngê nmo pyede. Pini n:ii yi kn:aadi te kópu knî yi p:uu daadî nuw:o, d:ââ mb:aa ntee tpile ngê wa pyódu, nmî Lémi ka pi mb:aa ngê wa pyódu. Dpodoni u pi ndîi nmî Lémi ngê u yi u ngwo adî kwo, Yi pini ngê choo dódó, u ntââ wadî dódó.

<sup>22</sup> Yinté pini ngê chi ya, kópuni pi kamî knî yi nuu u kópu ngê a pyede, nangmê d:uu. Nmî Lémi ka pi mb:aa ngê chi ya, u dpodo p:uu nyi kele, nangê dódó. Yoo yi nuu ghi dmi nódó choo ya. Yélini yi p:uu tupwó daa t:a, nmî Lémi ka mye ngêpê nyédi, yi yéli yi k:ii mb:aamb:aa ngê nipi dmyiné ya.

<sup>23</sup> Kópu knî yi nt:u kópu knî yi p:uu kwopwepe ngê kêê nangê t:oo. Lama kîyedê tóó, yi kópu u l:êê dîy:o numo p:uu a d:uu nyédi.

<sup>24</sup> Nmî Lémi p:uu nye dpodo, kidingê kwopwepe, nuw:o mbêmê chi ndiye kîgha dé, límîlímî ngê ye nangê nod:e. \*

<sup>25</sup> Yélini m:uu adnyi d:uu, nuw:o ngê chi wátiwáti dé. Ndoó apê nmî Mí ngê yi nuw:o dmi wa a ngmêê té, u ndê kópu dyuu yi lama u ngwo wa yââ.

---

\* **2:19:** Njon 10:14-15    \* **2:20:** Lóma 9:21    \* **2:24:** 1 Tim 3:3

<sup>26</sup> K:omo tpile Setan ngê wunê a mgîmî too, u pono a vyápê té, ngmênê ndoo apê ala ngwo kwulo amênyinê pwaa té, mb:aamb:aa ngê amêdnyi nuw:o.

### 3

#### *Yoo dono ngê u ngwo wa pyaa dmi*

<sup>1</sup> Timoti a tp:ee, ala kópu lama choo a ya. Dini ghi n:i:ngê kuwókuwó wéni adî dyimêdyimê, yoo dono ngê wa pyaa dmi. \*

<sup>2</sup> Yi ngwo yi chóó yi kópu knî yi p:uu adnyi nuw:o, nté ndapî yi mb:aami ngê wa pyaa dmi, yi chóó yi pi dmi adnyi kmîmî dé, adnyi chaa, yoo yi pi dmi adnyi dyede dé, yi pye mî knî ye daadnyi ng:aa, nmî Mî daadnyi kwunokwuno, myedaadnyi chââchââ. \*

<sup>3</sup> Pi ka vyyuwo yi lama daadî ya, pi ye daadî ch:anêch:anê, adnyi pi p:uu danê, gheteghete u yoo ngê adnyi ya, numo p:uu adnyi l:êê, kópuni mb:aamb:aa dé, daa yi nuu u kópu ngê adnyi ya.

<sup>4</sup> Adnyi pi dódó, daa nuw:o mbêmê adnyi m:i:i, adnyi mbodo ndîî mbodo ndîî, yi chóó yi pi dmi adnyi kmîmî dé. Yi chóó yi pono adnyi vyápê, nmî Mî u nuu ghi dnyinté yi nódó adî ya.

<sup>5</sup> Yi komo knî y:oo nmî Lémi adnyi chaa kîgha, ngmênê u wêdêwêdê yi gha vy:o daadî ya. Yinté yéli ye kpeme dpî yey. \*

<sup>6</sup> Yinté pini knî ngmê p:o p:o dpî lee dmi, pyââ knî ngmê yi pee dpî kaa t:oo. Pyópuni yi pee dpî kaa t:oo, nuw:o yi mênê daa tóó, yi dono yilî yi p:uu

---

\* **3:1:** 1 Tim 4:1    \* **3:2:** Lóma 1:29-31    \* **3:5:** Mát 7:15,21; Taitas 1:16



a nuw:o nyédi, dono kópu yilí yi nuu u kópu ngê a pyede.

<sup>7</sup> Yi pyópu yoo dye ghi yintómu a ndiye nyédi, ngmênê doo u ntââ ndê kópu dyuu yi lama daawa yââ.

<sup>8</sup> Yichip pi miyó, Njanes pini dê Njambîdes, pipi kópu mbêmê mbwudu ngma a chaa ngópu, Mósisi p:uu u ngwo ntee dnya a d:uu, pi dódó pyu yoo yinté ndê kópu dyuu p:uu mye d:uu nyédi. Dnyinté a nuw:o té, nmî Lémi ka daa kêlîmî té.

<sup>9</sup> U yi y:e a kwo, Pi yintómu nmî pee nmî kaa té, ngmênê wa dêê dmi, mu kópu u díy:o pi yintómu knî y:oo yi l:êê ghi dmi wa m:uu t:oo, awo, Yi mbodo dmi podó dé. Njanes pini dê Njambîdes Mósisi ka mbwudu chapî ngê ntee daa nî knopwo, yi yéli yinté wamye dêê dmi.

*Póól ngê Timoti ka u ngwo a vyu, D:aa pi dódó pyu, pi dódó pyu ngê kidangê pyódu*

<sup>10</sup> Lama kîyedê tóó, d:aa pi dódó pyu ngmê. Dye ghi daadîi ngópu noo a dpodo, yoo myenoo a ndiye kîgha dé. Kópuni u l:êê díy:o n:aa dpodo yédi, lama wunê a yaa wo. Lama kîyedê tóó, nmî Lémi ka ntênê n:aa kêlîmî, yoo yi nuu ghi dmi a nódo mye tóó. Lama kîyedê tóó, nmî Lémi p:uu dpodo tédê dono yilí noo a vyîmî, u dpodo u wépi dîpî puwâ.

<sup>11</sup> Kópuni dono Antiyóka, Yikóniyêm, Lisitîda a nga a pyaa dniye, lama kîyedê pyede. K:omo tpile yi dono kópu ndîi a nga a pyaa dniye, ngmênê nmî Lémi ngê yi kêlê mêtê dyé noo. \*

---

\* **3:11:** Dpodo 13:50; 14:5,19-20

<sup>12</sup> Nyââ, n:ii ngê u yi adî kwo, Yesu Kédisu u yoo vy:o ní ghê, Yesu ntee pini ngê nî pyódu, yi pini p:uu yoo adnyi d:uu, p:uu adnyi dono. \*

<sup>13</sup> Pi dono yoo, pi dódó pyu yoo yi k:ii, kópu dono yilî adnyi d:uud:uu, y:ay:a wa pwiyé dmi, Setan ngê adî dódó dé, yoo u nkwo adnyi dódó.

<sup>14</sup> Timoti a tp:ee, yinté pini ngê kidangê pyódu. Kópuni nyinê ndê too, yi kópu knî ye nyi kêlîmî mbê wo, ndê kópu ngê nga dny:oo ya, mu kópu u dîy:o yélini yi k:ii nmeê a ndiye kîgha ngi, dpîp:o dóó nyoo, k:omodanê kópu nga dpîp:o vvu. \*

<sup>15</sup> Nuw:o mê diyé we, dini ghi n:ii ngê tp:ee têtê ngê nyoo a ya, nmî Mî u kópu dyuu p:uu nyoo a ndiye. Yi kópu dyuu ngê nmî Mî ka maa nmo yiné dpo kêma, Yesu Kédisu ka u ngwo nmo kêlîmî té, u l:êê dîy:o kóó k:oo wa kaa nmo.

<sup>16</sup> Yi kópu yintómu nmî Mî u wêdêwêdê mbêmê a d:êê tumo. Yi kópu dyuu mbêmê yoo nmo ndiye kîgha too, yélini dnyinté a nuw:o nyédi, yi kópu dyuu mbêmê nmo wátiwáti too. Yi kópu dyuu mbêmê yoo yi dyââpe myino pwapî too, maa mb:aa p:uu nmo kapî too. \*

<sup>17</sup> Pini n:ii nmî Mî p:uu a dpodo yédi, yi kópu dyuu choo a kpââ, kópu mb:aa yilî yintómu, u ntââ yi pini ngê u ngwo adî d:uud:uu dé.

## 4

*Póól ngê Timoti u dpodo u l:êê dîy:o u ngwo wêdêwêdê kwólu*

---

\* **3:12:** Njon 15:20    \* **3:14:** 2 Tim 2:2    \* **3:16:** 2 Pita 1:21

<sup>1</sup> Timoti a tp:ee, nmî Mî ngîma myenté Tp:oo Yesu Kédisu u ngîma, kópu nga ngmênînê tpaépê. Dini ghi n:ii ngê Yesu Kédisu wa a diyé, u pi ndîi ngê wa pyódu, wa kóté kalê nmo. Yélini mwiyé pw:oo dniye, wa kóté kalê té, yélini yi ngwo adnyi ya, wamye kóté kalê té. \*

<sup>2</sup> Yi kópu u l:êê dîy:o u kópu dyuu pi knî ye chi tpaépê. K:omo tpile nga adnya a ng:aa, ó daadnya a ng:aa, ngmênê ye chi tpaépê. Yélini dnyinté a nuw:o nyédi, chi wátiwáti dé. Yélini a dono nyédi, yi dono ye chi kwódukwódu dé. Yélini mb:aamb:aa ngê maa p:uu a wee, chi wêdêwêdê kîgha dé, chi ndiye kîgha dé, modo l:âmo lîmîlîmî ngê kîdangê ngêpa. \*

<sup>3</sup> Ala ngwo dpodombiy:e chi dpodo, mu kópu u dîy:o mu dini ghi ngê yoo ndê kópu dyuu ka daadnyin:aa ng:aa, u yi y:e adî kwo, Kn:aa kópu knî m:uu nmî nyêmî. Yi ngwo n:ii knî y:oo yi nuu u kópu dé ye adnyi tpaépê dé, vyîlo yi yéli ye adnyi ng:aa. \*

<sup>4</sup> Nmî Mî u ndê kópu dyuu u wépi wa pwaa ngmê, w:êê danêmbum knî yi p:uu adnyi nuw:o.

<sup>5</sup> Ngmênê yinté pini ngê nangmê pyódu. Dye ghi yintómu mb:aamb:aa ngê chi nuw:o, dono cha a vyîmî dé, pi knî ye nmî Lémi u kópu dyuu chin:aa tpaépê dé, ntênê p:uu chi dpodo.

*Póól, Timoti ka u pwopwo p:uu u ngwo doo d:êê*

<sup>6</sup> A chóó a p:uu kópu nga ngmênînê tpaépê. Pi knî y:oo tpile tp:oo kpêê ngê ntee dpî yé t:oo, Chóó Lémi u ngwo dpî châpu ngmê, daa kêmakêma dyámê nînê

---

\* **4:1:** Dpodo 10:42; Lóma 14:9-10    \* **4:2:** Dpodo 20:20,31    \* **4:3:** 1 Tim 4:1

kuwokuwo, yinté n:aa pyodopyodo, Chóó Lémi u pi u ngwo anî knî.

<sup>7</sup> Mbêpê têdê dpodombiy:e noo mbêpê, dîpî kede wo, u ndê kópu dyuu d:oongê ngmópu.

<sup>8</sup> A dpodo u pywuu ngê mbóó p:uu kîyedê t:âât:ââ nê, Chóó Lémi ka d:ud:umbiy:e pi mb:aa ngê u ngwo an:uu pyódu. Kuwókuwó wéni ngê nmî Lémi ngê ntênê wa kóté kalê nmo, a pywuu u ngwo a ka wa a kê. Ngmênê daa a mo. Yélini yi k:ii nmo t:âât:ââ, nmî pywuu dmi kwodonkwodo nmo wa a kê. \*

### *Póól ntee doo mgîni vyîmî*

<sup>9</sup> Timoti, u ya a nga a kwo, Lîmîlîmî ngê a ka dpo pwiyé.

<sup>10</sup> Dimas ngê a kuwo noo, Tesalonika loo, mu kópu u dîy:o u nuw:o dyámê u kópu knî yi p:uu a kwo. Kîdesens Nkalásiya Wee u kwo loo, Taitas Dalîmesiya Wee u kwo loo.

<sup>11</sup> Luukî mu ngmidi a p:uu ayedê t:a. Mak amîm:aa dpo ngépi, u k:ii nipi dpo lee cho, mu kópu u dîy:o a dpodo têdê yinê pîchoo ngêêpi nê. \*

<sup>12</sup> Tikikas Epeso kîni dy:ââ ngê. \*

<sup>13</sup> Dini ghi n:ii ngê Tídówas nê kuwo ngê, a nkuwo kpîdî puku dmi péé Kapas u ngomo k:oo nê kuwo doo, u kwo dpo ngee dé, a ka dpo núw:o dé. A puku dmi n:ii tpile tp:oo too pee ngê l:âmo tumo, yi yi dmi a nga mb:aamb:aa ngê a kwo. \*

---

\* **4:8:** Tpyuu 2:10      \* **4:11:** Dpodo 15:37-39      \* **4:12:** Epeso 6:21-22      \* **4:13:** Dpodo 20:6

14 Pini n:ii ngê nkéli chêêpî pee ngê tpile a l:âmol:âmo too, Aleksândê, a pi yono dyênê ngê. Nmî Lémi ngê ntââ u ngwo wa a vy:u. \*

15 Nga cha a vyyuwo, kîngê dyênê ngi. Kópuni noo tpaêpê dé, d:ud:umbiy:e doo u nuu u kópu ngê pyaa dniye, a ka doo a kwopwepe.

16 Dini ghi n:ii ngê kada pini ngê mwiyé a kóté kalê noo, pi a nkîgh:ê dêpwongmê kwo, a pyipe knî y:oo a mo a kuwo noo. U ya a nga daa kwo, Nmî Mí ngê ntââ ye dpo vy:ee ngê.

17 Pi a nkîgh:ê dêpwongmê kwo, ngmênê nmî Lémi a nkîgh:ê vyîlo yidoo kwo, yinê doo wêdêwêdê kîgha nê. U yi u ngwo doo kwo, Yélini daa Nju tpémi nê ngê a kópu dyuu ye vyi ngê, yi yéli y:oo ny:ee y:e. Nmî Lémi ngê wodêpê ngee noo, ye a vyeê tédê pí dy:ââ noo, layóni knî y:oo pí ma noo. \*

18 Yi ngwo ntee a ngee noo, dono yintómu yi kélé yinté amye dyé nê, kóó k:oo amî kaa nê. Yi kópu u l:êê díy:o dye ghi yintómu u pi kmîmî koo, chedê ngê kîngê pyódu. Yinté choo ya.

### *Póól u nd:uu tpaêpê*

19 Akwila cha Pîdisila ye a mb:aamb:aa dpî yéni, Onésipódas mupwoknî ye a mb:aamb:aa myoo yéni. \*

20 Edastas Kódin nê kuwo ngê, Tîdopimas Militas nê kuwo ngê, mu kópu u díy:o doo a mbii. \*

21 Yópu ndîi u dye ghi ghêlî k:ii kîngê d:ii, u ngwo dpo pwiyé.

---

\* **4:14:** 1 Tim 1:20; Lóma 2:6 \* **4:17:** Dpodo 23:11; 27:23 \* **4:19:** Dpodo 18:2-3 \* **4:20:** Dpodo 19:22

Yupulas, Pudens, Lainas, yi pini pyile knî yi k:ii nmî mb:aamb:aa nga dpo dy:ââ, nmî tîdê Kîlódiya ngê u mb:aamb:aa nga myeda dy:ââ. Yélini nmî Lémi ka al:ii wunê kêlîmî té, yi mb:aamb:aa nga myedê dy:ââ ngmê.

<sup>22</sup> Nmî Lémi nga choo a vynuwo, nmî Mî ngê choo a ngêêpî nmyo.

Wu u dí.

**NMÎ MÎ U KÓPU DYUU**  
**The New Testament in the Rossel Language, also called**  
**the Yele Language, of Papua New Guinea**  
**Nupela Testamen long tokples Yele Rossel long Niugini**  
copyright © 1998 Wycliffe Bible Translators, Inc.

© 2011-2013 Wycliffe Bible Translators, Inc.

Language: Yele Rossel (Yele)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2009-11-03

---

PDF generated using Haiola and XeLaTeX on 18 Apr 2025 from source files dated 13 Dec 2023

f23d3065-5277-5598-adb2-6416a21ad128